



Boletin informativo lagadishi

Reptil

Ora bo wak rònt di bo, bo ta mira ku nos isla tin hopi bestia interesante. Algun di e animalnan aki ta pertenesé na e klase di reptil.

Tur reptil tin un kueru duru i tai ku ta protehá nan kontra sekamentu. Ademas nan ta pone webu den santu i e webunan aki ta desaroyá dor kayente di solo. Reptil mester regulá nan temperatura di kurpa dor di keinta den solo òf bai skonde den un lugá fresku. Pa e motibu ei nos ta yama reptil bestia di sanger friu. Un nòmber straño, pasobra nan sanger no ta friu, pero ta dependé di e temperatura di pafó. Un otro karakteristiká di reptil ta ku nan tin pulmon.



Riba nos isla nos tin diferente sortu di reptil: turtuga di laman, kolebra i e lagadishinan.

Den e boletin informativo aki nos ta bai wak e lagadishinan mas di aserka. T'asina ku bo ta mira e animalnan aki tur kaminda rònt di bo.

Kolebra di Kòrsou



Karet

Tin hende ku ta haña lagadishi un tiki spantoso, pero si bo sa mas di e bestianan aki i wak un tiki mihó, bo lo mira ku nan ta bestia bunita i interesante i ademas importante pa nos naturalesa.



Mas informashon tokante e departamento NME (Natuur en Milieu Educatie) di Carmabi bo por haña riba nos:

Website: www.carmabi-educatie.org

Facebook: [carmabi NME education](https://www.facebook.com/carmabi-NME-education)

Instagram: [carmabi nme](https://www.instagram.com/carmabi_nme)



Totèki



Boletin informativo lagadishi

Dinosouro

Dinosauronan tabata reptil i tabatin kueru ku skama ku ta wanta awa, meskos ku krokodel i lagadishi, i nan tabata pone webu.

Dinosouro a biba den diferente époka. Mas òf menos 205 mion aña pasá e promé dinosauronan a aparesé riba mundu i mas òf menos 65 mion aña pasá nan a bira ekstinto. Nos isla no ta tabata eksistí ainda 65 mion aña pasá, ke men ku lastimamente nunca dinonan a kana rònt aki.



Akiriba e *T. rex* in a banda e *Brachiosaurus*.

Bo tabata sa...?

**Pa mucha sabí ku ke sa mas
ainda, tin hopi mas
informashon, pelikula i plachi
pa klùr riba nos wèpsiat**

**Òf, mas mihó: bin bishitá nos
Marine Education Center na
Carmabi Piscadera!**

Tabatin diferente sorto di dinosouro, di grandi bai chikí. Tabatin ku ta kome karni (karnivor) manera e *Tyrannosaurus Rex* i tabatin ku ta kome mata (hèrbivoren) manera e *Brachiosaurus*.

Awendia tambe nos tin reptil ku ta hèrbivor (manera yuana) i karnivor (manera pegapega). T'asina ku pegapega ta kome insekto.

Mayoria sientífiko ta pensa ku 65 mion aña pasá e dinosaurona a bira ekstinto komo konsekuensia di un impakto di meteorit. E impakto di e baranka for di espasio a generá asina hopi stòf den atmósfera ku lus di solo no por a yega superfisie di mundu i e klima a kambia.

I e reptilnan enorme, ku ta di sanger friu i ku mester di kayente di solo, no por a keinta nan kurpa mas.





Boletin informativo lagadishi

Yuana

Yuana ta biba tantu riba tera komo den palu. Ku nan uñanan skèrpi nan por hala nan mes ariba na tur kos. Nan ta tremendo subidó, ku no tin miedu di hasi salto peligroso di taki di un palu pa taki di un otro. Pues e bestianan aki no tin miedu di haltura.



Mas tantu yuana ta sinta den tòp di palu. E no ta hasi esaki djis pa kohe solo, pero tambe pasobra einan e ta sinti su mes mas agradabel. E ta skonde su mes entre e blachinan, kaminda ku su koló bèrdè e no ta hala atenshon. Asina e ta praktikamente invisibel pa enemigunan manera pushi i para ku ta yag. Mientras tantu e ta yena su barika ku blachi sukulentu.

Den nan boka yuana tin djente hopi chikitu. Ku e djentenan ei e yuana ta traha buraku den e blachi ku ela kaba hap aden i asina ta fasil pa e skùr un pida kita afó. E ta lora e pida blachi ku su lenga diki i despues e ta guli'è. Nan ta gusta kome kasi tur kos, algu ku lo bo ripará si bo tin algun yuana den kurá. Nan stima e flornan i frutanan di shimaruku, asta ora nan ta bèrdè. Karawara spañó tambe nan gusta mashá i e blachi i flornan bunita di Franse Bloem tambe ta dispersé den stoma di yuana.



E yuana hembra ta pone un averahe di 16 webu den e buraku i ta yena e buraku bèk ku tera. E webunan mester di mas òf menos tres luna pa desaroyá kompletamente i despues di e tres lunanan ei e yuananan chikitu ta Sali for di nan webu. Nan mes ta koba un pasio for di e hòl bai ariba. Unabes nan Sali e yuananan chikitu bèrdè ta buska e palu òf mata mas serka bou di kua nan por skonde. Despues di un ratu nan ta dispersé den e palu i matanan pa mesora kuminsa kome e blachinan sukulentu, flor i frutanan.





Boletin informativo lagadishi

Pegapega

Ku su pianan ku ta chupa pega nan ta e akrobatnan den tur reptil.

Nan ta kana subi muraya i plafònt sin problema i bo ta mira nan prinsipalmente anochi ora ta birando skur.

T'asina ku pegapega ta bestia nokturno i pesei nan tin wowo grandi. Ku nan wowonan grandi nan por wak bon den sukú tòg.

Nan ta kome prinsipalmente insekto manera sangura, muska i kakalaka. Pues nan no ta djis bestia prèt pa mira, pero nan ta bestia útil tambe.

Pegapega chikitu hopi biaha ta koló hopi kla, kasi transparente. Esnan mas grandi hopi biaha ta shinishi ku mancha skur.



Meskos ku tur otro reptil, pegapega ta pone webu ten tera den un hòl. Pues nan mes no ta brui e webunan i nan no ta sòru pa nan yunan ora nan sali.



Bo tabata sa...?

... ku e lagadishi di mas grandi na mundu ta e dragon di Komodo?

E dragon di Komodo por bira te 3 meter largu i ta hañ'é na e isla Komodo na Indonesia.

E ta un karnivor i ta kome biná, buffalo i ta peligroso pa hende tambe.





Boletin informativo lagadishi

Kolebra di Mespel

E nomber kolebra di mespel no ta korekto. E bestia aki no ta un kolebra, sino un lagadishi. Pasobra e tin pia chikitu ku no ta kai na bista, i tin strepi blanku riba su lomba, e parse un kolebra,

Kolebra di mespel ta biba prinsipalmente den bisindario di un kapa di blachi morto, pasobra e ta biba di e insektonan chikitu ku ta biba einan. I pasobra bou di palu di mespel hopi biaha tin hopi blachi morto i fruta di mespel dañá ku ta atraé insekto, e nòmber a bin di esei.



Bo no sa mir'é hopi, pasobra e gusta skonde pa lagadishi mas grandi i paranan ku lo kier kom'é.

Ora tin peliger, e por tira su rabu abou, meskos ku hopi otro lagadishi. E bestia ku kier kome e kolebra di mespel ta bai tras di e rabu ku ta trose i e kolebra di mespel por hui. Despues di tempu e rabu ta krese bèk!

Blòblò

Blòblò ta kome tur kos (onmivor), nan ta kome por ehèmpel fruta, insekto i webu for di nèshi. E adultonan machu tin un teritorio ku nan ta defendé kontra otro machu. Den kurá bo por mira nan kore tras di otro hopi.

E animalnan jòng i e hembranan ta koló maron i e machunan tin un kabes blòu ku pia blòu bèrdè. Hopi hende ta kere ku e lagadishinan ku koló diferente ta diferente sorto lagadishi, pero nan tur ta blòblò.



Pasobra e machu i hembranan ta asina distinto di apariensia, na Papiamentu e machunan ta wòrdu yamá Blòblò i e hembranan Lagadishi.





Boletin informativo lagadishi

Totèki

Kada isla tin nan diferente sorto totèki. Den pasado e animal chikitu aki probablemente a yega riba e diferente islanan, por ehèmpel komo 'pasahero' riba tronkon di palu ku ta drif.

Den transkurso di hopi aña e animal a adaptá su mes na su bisindario nobo riba e isla. Na e manera ei sortonan nobo a originá ku bo ta haña riba un isla so. Ora ku bo ta haña un sorto na un kaminda so, nos ta yama e sorto ei endémiko.

Nan ta animal delegá, koló maron ku strepi pretu den banda. Un koló pa skonde perfekto. Ora e machi ke defendé su teritorio e ta saka un saku di garganta hel ku ta hopi notable. E ta usa e saku di garganta he lei tambe ora e kier sedusí un hembra.



Totèki ta kome insekto chikitu. E mester di tin un bon koló pa skonde, pasobra bestianan mas grandi manera para ku ta yag, blòblò i kolebra di Kòrsou gusta kome totèki.

E kolo kamuflá perfekto..

Bo ke sa mas?

Carmabi tin boletin informativo tokante Yuana, Kolebra di Kòrsou, bestianan riba nos isla i hopi mas tópiko tambe. Bon pa si bo ta kaweta, mester hasi un spreekbùrt òf mester skibi un relato.